



**Kenyataan Media**

**18 Mac 2023**

**UNTUK SIARAN SEGERA**

## **Projek ECRL Capai 10 Juta Jam Bekerja Bebas LTI**

**Dungun, 18 Mac:** Projek Laluan Rel Pantai Timur (ECRL) telah mencatat satu lagi pencapaian iaitu 10 juta jam bekerja tanpa kemalangan (LTI), sejajar dengan usaha dalam mengutamakan keselamatan dan kesihatan tenaga kerja semasa fasa pembinaan jajaran rel sepanjang 665 km.

Pencapaian 10 juta jam bekerja dengan sifar LTI telah direkodkan pada hujung bulan Februari 2023 yang berasaskan pelaksanaan bekerja secara selamat 24 jam sehari dan 7 hari seminggu (24/7) serta kerjasama yang efektif di setiap peringkat projek.

Malaysia Rail Link Sdn Bhd (MRL) sebagai pemilik projek ECRL dan China Communications Construction (ECRL) Sdn Bhd (CCC-ECRL) sebagai kontraktor kejuruteraan, pemerolehan, pembinaan dan pelaksanaan projek (EPCC) telah mengumumkan sebuah pencapaian yang membanggakan bersempena dengan perasmian Kempen Keselamatan dan Kesihatan ECRL 2023 di *casting yard* projek Seksyen 4 di Dungun hari ini.

Kempen yang bertemakan "Waspada Demi Hari Esok" telah dirasmikan oleh Ketua Pegawai Eksekutif MRL, Dato' Sri Darwis Abdul Razak, Pengarah Urusan CCC-ECRL, Kong Qi dan Ketua Pengarah Jabatan Keselamatan dan Kesihatan Pekerja (DOSH), Mohd Anuar Embi.

Turut hadir adalah Pengarah Projek MRL, Noor Azlan Salleh, Penolong Pengarah Projek merangkap Ketua Jurutera, Deng Bo, Pengurus-Pengurus Besar dari seksyen di sepanjang jajaran ECRL, Ketua-Ketua Bahagian Projek dan pegawai-pegawai kanan dari DOSH.

Sehingga kini, Projek ECRL dianggarkan mempunyai 17,000 tenaga kerja yang merangkumi kakitangan dari pemilik projek, kontraktor EPCC dan sub-kontraktor-sub-kontraktor.

Dato' Sri Darwis juga berkata pelancaran 'Kempen Keselamatan dan Kesihatan ECRL 2023' bertepatan pada masanya bagi memupuk kesedaran keselamatan, mengenal pasti potensi bahaya, dan meningkatkan keyakinan pekerja, sambil turut berkata bahawa kempen tersebut sejajar dengan pembinaan pesat dan peningkatan bilangan sehingga 350 tapak kerja utama sepanjang jajaran ECRL pada masa ini.

Projek ECRL telah melancarkan kempen keselamatan yang pertama pada Mac 2021 dan giat menjalankan penambahbaikan progresif terhadap sistem pengurusan keselamatan, antaranya latihan kepada lebih 1,000 kakitangan melalui simulasi dan latihan ketangkasan reaktif di Pusat Latihan Keselamatan mereka di Kemaman, Maran dan Bentong yang telah diluluskan oleh DOSH. Pusat-pusat latihan ini juga menyediakan latihan kecekapan yang melibatkan *Authorized Entrant and Standby Person* untuk ruang terkurung.



Pusat Latihan Keselamatan dilengkapi teknologi realiti maya (VR) yang membolehkan simulasi dengan hampir 100 situasi berpotensi berbahaya di tapak pembinaan serta dapat menawarkan pengalaman seperti pemindahan dari terowong, kejutan elektrik, ujian asas topi keledar keselamatan dan penolakan penahan dinding.

Kong Qi, Pengarah Urusan CCC-ECRL berkata, “Suatu ketika dahulu, para pekerja perlu hadir di taklimat keselamatan yang mengambil masa berjam-jam. Namun, dengan adanya simulasi VR yang realistik, mereka kini dapat merasai situasi berbahaya tanpa berhadapan dengan kecederaan serta mendapat manfaat daripada pembelajaran yang menarik dan lebih interaktif. Pendekatan ini terbukti berkesan dengan pencapaian matlamat sifar LTI.”

“Bagi pihak CCC-ECRL, kami ingin merakamkan penghargaan kepada Dato’ Sri Darwis dan MRL atas kepercayaan dan sokongan mereka, dimana kami bersama-sama mengutamakan keselamatan para pekerja. ‘Kempen Keselamatan dan Kesihatan ECRL 2023’ adalah komitmen yang berterusan kami dalam mengekalkan amalan tersebut untuk jangka masa panjang,” tambah Kong.

-Tamat-

---

Untuk pertanyaan media, sila hubungi:

**MRL**

Hazelinda Mazlan  
Tel: 03 6411 5800 Ext. 5830  
Email: [hazelinda.mazlan@mrl.com.my](mailto:hazelinda.mazlan@mrl.com.my)

Yong Min Wei  
Tel: 03-6411 5800 Ext. 5835  
Email: [mwyong@mrl.com.my](mailto:mwyong@mrl.com.my)

Ani Azureen Zainuddin  
Tel: 03 6411 5800 Ext. 5913  
Email: [azureen@mrl.com.my](mailto:azureen@mrl.com.my)

**CCCECRL**

Grace Cheng  
Tel: 012 202 7822  
Email: [bycheng@cccecr.com](mailto:bycheng@cccecr.com)

Theresa Lam  
Tel: 018 201 3830  
Email: [theresa.lam@sprg.com.my](mailto:theresa.lam@sprg.com.my)